

2 CORINTIOS

Yi Mimetz Necy Huidibi San Pablo Yajnigujx Je Mibijcpidijc Jim Corinto

¹ Ich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Ich müd ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot.

² Huen Dios Teedy etz ich ajt nHuindzin Jesucristo may'ajt oy'ajt tunipy müd müch ajcxy etz xyajjotcugíyigixip.

Nej Pablo yajty y'ayoy

³ Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcujc'ajtín.

⁴ Dios xyajjotcugíyim co nminaxim nyajnaxim tzaachypi ayo'n jigix jëbi nyajjotcugíyim jacpinjaty huidibi minajxp yajnaxp tzaachypi ayo'n. Tim jadu'n nej ich ajcxy ti nbaady jotcujc'ajtín ma Dios, nañ tim jadu'n yi' ajcxy padañ jotcujc'ajtín ma Dios huidibi minajxp yajnaxp tzaachypi ayo'n.

⁵ Com tim jadu'n nej ich ajt nminaxim nyajnaxim tzaachypi ayo'n müd Cristo ycixpi, nañ tim jadu'n müd Cristo ycixpi nbaatim jotcujc'ajtín.

6 Paady ycixpi ñich ajcxy nminajxcixy nyajnajxcixy tzaachypi ayo'n, jaydëbi miich ajcxy mbaadip jotcuyc'ajtín etz nañ jadu'n ypaadip ajcxy m'alma ñidzoocin. Dios yejcpy jotcuyc'ajtín ma miich ajcxy, jaydëbi miich ajcxy mbaadip jotcuyc'ajtín etz nañ jadu'n ñidzögip ajcxy yi m'alma. E co ajcxy mbaadip jotcuyc'ajtín etz ajcxy m'alma ñidzoocin, chí jëbi miich ajcxy mmimadägip etz mmecxtugip tzaachypi ayo'n, tím jadu'n nej ñich ajcxy nmimadägy etz nmecxtújccixich tzaachypi ayo'n.

7 Jotcuyc nayjihuiyijich mïd miich ajcxy ycixpi, com njjip'ixpich co mmadägipy ajcxy ma mmibijcin. Com nejhuïybich co miich ajcxy mminajxyp myajnajxypi tzaachypi, tím jadu'n nej ñich ajcxy nminajxcixy nyajnajxcixy tzaachypi. E nañ jadu'n Dios yejcpy jotcuyc'ajtín ma miich ajcxy, tím jadu'n nej yecy jotcuyc'ajtín ma ñich ajcxy.

8 Migügtijc ajcxy, ñich ajcxy ndzojcyipich co miich ajcxy mnejhuïhuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njjip'ixyich co nbidzimipyich juugy ma je jimbi it lugar.

9 Jadu'n ñich ajcxy nnayjihuiyii nej jäy ajcxy huidibi yajpatcixp o'cjijp'am. Jadu'n ti njatyich, jigix jëbi n'ixpicyich nej ñich huaad nigí Dios nyajmij'atyich, je Dios huidibi yajjugypigip yi jäy ajcxy tïbi y'öccixy. E ca' nan ngi'm mic'ajt nmijpidaacpyich.

10-11 Ti ñich ajcxy Dios xyñihua'ñ xycohua'ñ, e xy-

jacnihua'naamb xyjaccohua'naambich ajcxy ma yi jäy ajcxy huidibi xyaj'ögaambich ajcxy. E co mi-ich ajcxy xypubejtyich, copicy co jacmibijctzoogix Dios müd ich ycixpi. Njijp'ijxypich co Dios yi'xyjatyimy xyñihua'naambich xycohua'naambich. E pen mayjäy Dios mibijctzoogixy müd ich ycixpi, nañ jadu'n yajnájxcixyipy ajcxy jäygi'daacin ma Dios müd je may'ajt oy'ajt ycixpi huidibi Dios ytumyb müd ich ajcxy.

Ti Pablo co yhuäcxijpy, ca' chojc nicxy jim Corinto

12 Jotcujc nayjihuiyijich müd jada ycixpi com nejhuüyibich co ti ndzinäyich müd tudägy'ajtin etz müd oyjot oyhuinma'ñ müd yi mayjäy ajcxy canaag agajp etz jacnigi ma miich ajcxy. Dios müd may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzináayinich.

13 Ich miich ajcxy nyajnijayüyb je ayuc tiy'ajt huidibi miich ajcxy jëbi mgapxcixy etz mhuinjihuügyixy. E nañ jadu'n njijp'ijxypich co miich ajcxy mhuinjihuüipy ich n'ayuc tüg'óciy.

14 Jadu'n nej miich ajcxy cham cujc-huäcxy mhuinjihuügyixy ich n'ayuc ndiy'ajt. Jacjiini co anajty je xü je tiempo ymiñ co ajt nHuindzin Jesús y'ane'mañ ya naaxhuiñ, chi miich ajcxy jotcujc mnayjihuiüyüb müd ich ycixpi. E nañ tim jadu'n nej ich ajcxy jotcujc nayjihuiüyüb müd miich ajcxy ycixpi.

15 Com nejhuüyibich co miich ajcxy xychojcpich xyjihuiüyibich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc.

16 Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc nnicxa'ñich ma miich ajcxy. E jadu'n jëbi miich ajcxy xytüjijphuohuñhuibich co anajty nnicxyich jim Judea.

17 ¿Nej mdijy, co ñich aametz jotmetz nduñich co ca' ti nnicxyich ma miich ajcxy nej anajty ti nmına'ñich? ¿Nej mdijy, nhuinma'ñ mïdidyich jadu'n nej naaxhuiñyjäy huñdibi minamb co ñicxa'ñ, e chi ca' ñicxni?

18 Per Dios jëbi tiy'ajt yegipy co je ayuc tibi nyajnimaaгыxy, nguydunipyich yi'. ñich n'ayuc janch yi'.

19 ñich mïd Silvano etz Timoteo ngapx-huäxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je' y'ayuc, tudägy je' ycapxy.

20 Tüg'óciy je ayuc huñdibi Dios yejc jecy'ajty mïd ñich ajt ycixpi, hue' Cristo Jesús cuydun-daayb. Paady co ngapxpaatim n'ojadajtim Dios, chi nmınaanim. “Amén, jadu'n jada,” com Cristo Jesús ti cuydundäy Dios y'ayuc.

21 Com je' je' Dios huñdibi xyajmibijcim Cristo, e Dios huñdibi xyajmïd'ijtim Cristo. Jadu'n Dios ytuñ mïd ñich ajcxy etz nañ jadu'n mïd miich ajcxy. Je' je' Dios huñdibi xyajñibijcim etz xypidaacim tügjijp ma yi' ytung.

22 Dios ti pidägy ma ajt njot nhuinma'ñ je tiy'ajt co nyajpaatim ma Cristo Jesús. Co Dios xy'adigüyım xyjottigüyım yi' yjihuñ ymic'ajt, chi tiy'ajt yecy co nyajpaatim ma Cristo Jesús.

23 Dios jëbi t'iy'ajt yegipy co m'iid tudägy njot nhuinma'ñ nmiydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'ñ ti nbidägyich, m'iid co ca' ndzocyich nicxy n'ojcixy huin j'ijp.

24 Ca' nnicxa'ñich mic'amy ma miich ajcxy, com ca' adzip nyajmibigaangixy miich ajcxy hu'idibi copicy ajcxy mmibigipy. Miich ajcxy tiydudägy ti mmibijccixy. Jëyi co nbubedaangixy jaydëbi ajcxy n'igi jotcuyc'ajt mm'iid'adipy ma ajcxy mdzinaayin mjugy'ajtin.

2

1 Paady ycixpi jadu'n nhuinma'ñ ti nbidägyich co ca' nnicxa'ñich mic'amy jadüg'oc ma miich ajcxy, m'iid co miich ajcxy nyajtajipy nyajmayipy co ngapxhuijyich m'iid ajcxy mbocy ycixpi.

2 Com pen ñich miich anajty ajcxy nyajtajpy nya-jmaayb, ¿pin jada' ñich xyajjotcugihuibich? Pues miich ajcxy hu'idibi tajp mayb, miich ajcxy xya-jjotcugihuibich.

3 Paady ycixpi ti nnijayiygixy jadu'n co ca' nnicxa'ñich mic'amy ma miich ajcxy, com ca' jadu'n ndzocyich co ñich miich ajcxy nyajtajipy nyajmayipy. Jac'oy co ñich miich ajcxy nya-jjotcugihuiipy. Com nejhuñybich co ñich jotcuyc nayjhuñyijich m'iid miich ajcxy ycixpi. Nañ jadu'n miich ajcxy jotcuyc mnayjihuihuñyb co mnejhuñhuipy co ti njotcugihuibich m'iid miich ajcxy ycixpi.

4 Co ti njayich je necy hu'idibi ti nguexyich ma miich ajcxy, ooy mij jotmay ti njihuñyich, ixti

nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuuygixy co mijcajee ndzojccixy njihuuygixy.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ich tügpajc tajin mayim jihuuybich. Nañ jadu'n miich ajcxy nidüg'óciy mjihuuygixyp tajin mayin. Jadu'n nmına'ñich co huenjaty tajin mayin miich ajcxy mjihuuygixy, jigix ca' anaxy ajcxy nyajtajip nyajmayip.

⁶ Yajhuäcxijp je tzaachypí huidibi miich ajcxy mooyb je migüg huidibi ti ytundigooy. Ti mïd jadu'ñi.

⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuipy. Ca' yjecyity co je migüg anaxy oy jihuuiip tajin mayin.

⁸ Paady ycixp may'ajt nbijctzooyich ma miich ajcxy co myajniguëxigipy ajcxy co mdzocy mjihuuy ajcxy je migüg huidibi ti ytundigooy.

⁹ Ich miich ajcxy ti nijayiy jayhuin mïd je migüg ycixpi huidibi ti ytundigooy, jigix jëbi nnejhuuyich, pen mguydumyb miich ajcxy ich n'ayuc, o pen ca' mguydungixy.

¹⁰ Jadachambi co pinjaty ti ytundigooy ma miich ajcxy, e miich ajcxy mhuinmecxi yi' ypocy, nañ jadu'n nhuinmeecxip ich yi' nej ytundigooy. Com ich co nhuinmeecxyich tüg nmigügich nej ti ytundigooy, jadu'n nduñich mïd miich ajcxy

ycixpi, com Cristo y'ijxyp ñejhuüyb tüg'óciy tijaty nduunim.

¹¹ Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhuüyim yajxon nej Satanás mañ'ajt müidity.

Pablo ca'p anajty jotcuje'aty jim Troas

¹² Co nja'tyich ma je cajp huidibi xüjip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung.

¹³ Per ca' anajty jotcuje nayjihüiyiich. Com ca' nmīnaybatich je ich ajt nmigüg Tito jim Troas. Paady ycixp ngapxycijxyich müid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnaxypich jäygidaacin ma Dios co müid Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojy xi ya.

¹⁵ Co ngapxhuäcxich Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxich Cristo y'ayuc ma yi jäy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihüiy nboomjójicixich jabom jabom ma Dios yhuinduu müid Cristo ycixpi.

16 Pinjaty mijpidacp Cristo y'ayuc huídibi ngapx-huäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ñich ajcxy ndung.

17 Ca' ñich ajcxy nduñ jadu'n nej jacnaagity ajcxy huídibi Dios y'ayuc mihuidijtip meeñgíxy. Cíxyjot huinjot ñich jäy nyaj'ixpijccíxy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Míid co nyajpaatim ma Cristo, paady ycixp nduunim jadu'n nej jihuiy nyajpaatim jabom jabom ma Dios yhuinduu.

3

Je jemybi ayuc tiy'ajt huídibi Dios xymooyim

1 Co jadu'n nmína'ñich ¿nej m'ijxcíxy nej jihuiy huinjemy nyajtzondäga'ñich ayuc co ndzachnay-mayáanigíxyich ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijtzohuipich tüg tiy'ajt necy ma miich ajcxy, jadu'n nej nijëjity jäy ytungíxy?

2 Ca' ñich ajcxy ndiy'ajt necy ycopicyity. Com jëbi yi mayjäy ajcxy tiy'ajt pigipy ma miich ajcxy mdzinaayin mjogy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej ñich ajcxy ndiy'ajt necy yjaayity ma ñich ajcxy njot nhuinma'ñ. E jadu'n jäy ajcxy ijxcabipy etz huinjihuipipy.

3 Cristo ci'm ti pidägy yi' ytiy'ajt ma miich ajcxy mjot mhuinma'ñ míid je ayuc huídibi ti ngapxhuäcxych ma miich ajcxy. Jadu'n miich ajcxy nipaady nej tüg tiy'ajt necy huídibi Cristo ti

jaay. E huídibi ñch miich ajcxy ti nyaj'ijxcixy ti nyajniimaagyixy. Miich ajcxy ca' jadu'n ocpaatni nej tüg tiy'ajt necy huídibi jäy ti jay müd tinta. Nañ jadu'n ni ca' yjējity je tiy'ajt huídibi cojayip ma tüg tzaadzech. Hue' miich ajcxy janch nipaady nej tiy'ajt necy huídibi je Dios jugypi yjihu'iñ ymic'ajt ti jaay ma jäy ajcxy yjot yhuinma'ñ.

⁴ Nejhuñyibich tiydudägy co janch tiy'ajt nej nmına'ñich co Cristo ti xyajniñbicyich jada tung müd Dios ycixpi.

⁵ Ca'p ñch ajcxy jēbi ci'm madägy ma Dios ytung. Tüg'óciy mic'ajt etz tiy'ajt jüby nbáatcixyich ma Dios, huídibi müd jēbi ndúungixich yí' ytung.

⁶ Dios ti xymóoygixyich mic'ajt co ndunipyich ajcxy ma yí' ytung. Dios ti pidägy ma ñch ajt jemybi ayuc tiy'ajt, huídibi müd xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huídibi Moisés yjayhui'm jecy'ajty. Müd je Moisés y'ayuc huídibi jaybety ijtp, Dios xymooyim je o'cin. Müd je jemybi ayuc tiy'ajt huídibi je Espíritu Santo yejcpy, Dios xymooyim jugy'ajtin huídibi ca' ycixipy ytigoyipy ni mina.

⁷⁻⁸ Je Dios ycötujcin huídibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuiñyjip mic' y'adixy müd Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuiñyjip, co anajty ooy mic' chach'adixy. E jada Dios y'oy'ajtin huídibi Moisés ymüd, ca' jecy y'ijty. Hue' je' tigooyñip anajty oñydägy'amy. Per pen Dios yaj'ijxip anajty yí' y'oy'ajtin co Moisés moy je jäy ajcxy je Dios ycötujcin huídibi ane'm yí' o'cin, niği m'iidipy Dios

y'oy'ajtın je jemybi ayuc tıy'ajt huıdibi je Espıritu Santo xymooyım.

⁹ Pen mij anajty oy'ajtın mııdıty je cõtujcın huıdibi tuuñ co y'ane'my ma ıch ajt nbocy n'o'cın. Nıgi mij'oy'ajtın mııdıty Dios y'ayuc ytıy'ajt je jemybi huıdibi mınaamb co Dios jėbi xyaj'ahuımbıjtım tudägy.

¹⁰ Jėbi nmınaanım co je jėcyıp cõtujcın y'oy'ajtın ca' yı' ytimytiıjıty co nyajquipxyıhuaanım mııd je jac'oybi oy'ajtın huıdibi Dios y'ayuc ytıy'ajt jemybi ymııd.

¹¹ Com pen ymııd oy'ajtın je cõtujcın huıdibi ymic'ajt ca' y'ıda'ñ huınıxıı huınıtiempo, nıgi oy'ajtın mııdıty Dios y'ayuc ytıy'ajt jemybi huıdibi ca' ycıxıpy ytigoyıpy nımına.

¹² Mııd co njıjp'ıjxım je oy'ajtın huıdibi Dios xymöhuaanım mııd je jemybi y'ayuc, paady ycıxp ngapxhuäcxım Dios y'ayuc huınmic jotmic.

¹³ Ca' jadu'n nduunım nej Moısés ıdııch jecy'ajty co anajty mııdıty yhuiñyjıjp huingobe'nıy, jıgıx ca'ydı Israel jäy ajcxy ıxy nej je' anajty ytigoy je Dios y'oy'ajtın huıdibi anajty quėxıcp ma je' yhuiñyjıjpın.

¹⁴ Per yı Israel jäy jecy'ajty ca' ajcxy yajxon huınjıhuııy ti anajty Dios ytumyb mııd Moısés, ıxtı chambaadni yı Israel jäy ajcxy ca' yajxon huınjıhuııygıxy co ajcxy capxcıxy je ayuc huıdibi Moısés yjayhuı'm. Jadu'n nipaady nejııhuııy Moısés chambaadni y'ıtyñı huingobe'nıy. Co ajcxy mııbigıpy je Cristo, huın'ıt ajcxy huınjıhuıııpy, e jadu'n je' paadıpy nej jıhuııy Moısés ti ñayhuingobe'ndüdyıı. Co yı Israel jäy ajcxy

mibíjccixipy Cristo, e ijsxip ajcxy Dios y'oy'ajtín, huin'itni ajcxy huinjihuipy Dios y'ayuc ytiy'ajt je jécyip.

¹⁵ Ixti chambaadni co yi Israel jäy ajcxy capxcixy je migooxpí libro huídibi Moisés yjayhui'm, ca' ajcxy huinjihuipy yajxon Dios y'ayuc, jadu'n nipaady nej ajcxy yhuinma'ñ ymäditý.

¹⁶ Pínjaty jothuimbijtp, e mibícy ìch ajt nHuindzin Jesucristo, oyíyñip yi' yhuinma'ñ, e yhuinjihuipy Dios ytiy'ajt.

¹⁷ Je Huindzin Jesucristo, yi' je' Dios yjihuí'ñ ymic'ajt ymíid. E ma Dios yjihuí'ñ ymic'ajt yajpaady, Dios yi' yi' jadu'mbi jäy ajcxy yajni-huätzictutp ma yi Dios ycötujcín je jécyip.

¹⁸ Paady ycixp tüg'ócíy ìch ajt jadu'n nipaady nej tüg ixx ma nni'ixím ajt nHuindzin Jesucristo y'oy'ajtín. Com ca' jadu'n patni nej jihuíy n'ijtim huingobe'níy. E nañ jadu'n ìch ajt njacyujcpejtím n'oy'ajtín, jaydëbi nguipxyjatytíyím míid Cristo. Com jabom jabom ìch ajt nígi nbaatím n'oy'ajtín ma Cristo. Jada je' huídibi je Dios yjihuí'ñ ymic'ajt ytumyb ma ajt njot nhuinma'ñ. E ìch ajt nHuindzin Jesucristo tí pídagy Dios yjihuí'ñ ymic'ajt ma ajt njot nhuinma'ñ.

4

¹ Com Dios tí xypa'ayooyích, e tí xyajníbicyích co ngapxhuäcxibích yi' y'ayuc ytiy'ajt jemybi, paady ycixp ca' njotmetzcíyích.

² Per ooy tí njijpcodijíygyxyích tí njijpcogapxíygyxyích yi' jäy ajcxy y'ayuc huídibi ajcxy ytungixyp etz ycapxcixpy ayüch ameech,

etz huídibí oymídzöyduuni. Ca' ñch ajcxy ti nduñich mïd jíbic-huinma'ñ. Nañ jadu'n ni ca' nyajtígájtzcíxich Dios y'ayuc. Hue' janchtiy ngapxpích ajcxy huídibí janchíp. Jadu'n nyaj'ixpíjccíxyích yí jáy ajcxy, jaydëbí ajcxy jotcuje ñayjihuíyígíxy ma Dios yhuinduu.

³ Yí jáy ajcxy huídibí níxxy y'alma ytígoyaangíxy ca'oydactuuby, ca' ajcxy huinjihuíy Dios y'ayuc oybí nej jëbí ajcxy y'alma nïdzögípy. Jada je' je ayuc huídibí ngapxhuäcxíxpích. Pínjaty ajcxy y'alma nïdzögíp yhuinjihuíyb ajcxy jada ayuc.

⁴ Yí' ajcxy huídibí y'alma tígoyaaníp ca' mibíjccíxy Dios y'ayuc, com Satanás huídibí ane'mb ya naaxhuiñ tí yajmädyii ajcxy yhuinma'ñ. Ca' je' ajcxy huinjihuíy Cristo y'ayuc oybí. Cristo tú'cíy yaj'íxy, tú'cíy mic'ajt mïdíty, nej Dios yaj'íxy nej Dios mic'ajt mïdíty. E Cristo y'ayuc jadu'n nipaady nej tüg mïjtícxín huídibí Satanás tí ahuijtzuty ca'ydí yticxy ma je' ajcxy.

⁵ Co ñch ajcxy ayuc ngapxhuäcxyích, ca' ñch ajcxy ngapxhuäcxy ngí'm'ayuc ngí'mdíy'ajt. Hue' ñch ajcxy ngapxhuäcxyp Jesucristo y'ayuc ytiy'ajt. Ngapxhuäcxyích ajcxy co Jesucristo ñihuindzín'ajttaayb tüg'óciy. E nañ jadu'n ngapxhuäcxyích ajcxy je tiy'ajt co ñch ajcxy jadu'n naydíjyígíxyích nej jihuíy miích ajcxy xytumbí'adyii mïd Cristo ycíxpi.

⁶ Je Dios huídibí jecy'ajty ane'm co huen tícxín jí'aty huídibí codícxíp ma ycoodzity, yí' tí xy-mooyím y'ayuc ytiy'ajt. Yí' y'ayuc tím jadu'n nipaady nej tüg tícxín nmïd'ajtím ma ajt njot nhuinma'ñ, jígíx jëbí n'íjxím je Dios y'oy'ajtín

huidibi quëxïcp ma Jesucristo yhuiñyijp.

Je jugy'ajtin co nmibicim

⁷ Je Dios y'oy'ajtin oybi nmïd'ajtim ma ajt njot nhuinma'ñ, ïch ajt ca' ni ti mic'ajt nmïd'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma ïch ajt, tim jadu'n nej jäy ajcxy pidaaccixy pi'cmeëñ ma pi'c'idzimboch.

⁸ Oy ïch ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich mïd je tzaachypi ayo'n ycixpi, per ca' nhuinma'ñyidigóoygixyich.

⁹ Oy ïch ooy nmïdzip xy'ixhuidityich xypahuidityich, per Dios ca' xy'ixmachich. Canaag'oc ïch nmïdzip ti xycujy ti xyjibipyich. Per ca' ïch njogy'ajtin ti ytigooy.

¹⁰ Hueñyama'amyity nhuidityich ajcxy nmïdich je tzaachï'au ma nninïcxich, ma jäy ajcxy ti xychaachytúungixich. Je' je' je iixpejt co nhuidityich o'cin jïjp'am, tim jadu'n nej Jesús anajty huidity o'cin jïjp'am. Ngöbijcypich jada tzaachypi, jigix tüg'óciy jäy ajcxy nejhuihuip co Jesús xypubejtpich xypudigïybich.

¹¹ Nami jacjugy'ajtnich ajcxy, o'cjïjp'am ïch ajcxy nhuidijtcixy jabom jabom mïd Jesús ycixpi, jigix jëbi tüg'óciy jäy ajcxy nejhuihuipy co Jesús xypubejtcixyp xypudigïygyixyp.

¹² Jadu'n ndzinäyich o'cjïjp'am, jigix miich ajcxy mïd'adip jugy'ajtin huidibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: “Ti nmibicyich, e paady ycixpi ti ngapxpidzimybich nej ti nmibicyich.” Tim jadu'n nej Dios ñecy ymina'ñ, nañ tim jadu'n ïch ajcxy

yminaangixy co nmibíjccixyich Dios, e paady ngaxpidzímngxixyich nej nmibíjccixyich.

14 Com nejhuiyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc mïd Dios ymic'ajt co anajty n'o'cim. E quipxyi mïd miich ajcxy xyajnicximip ma Dios yhuinduu.

15 Tüg'óciy tzaachypi huídibi nminajxypich nyajnajxypich, hue' nminaxyich nyajnaxyich mïd mich ajcxy m'oy'ajtin ycixpi. E co anajty Dios jactuñ may'ajtin mïd jacjadyii mayjäy ajcxy, nañ jadu'n mayjäy yajnáxcixipy jäygi daacin ma Dios, jigix jëbi mayjäy ñbáatcixipy capxpáatcixipy Dios.

16 Paady ycixpi ni mina xii, ñich ajcxy ngajotmetzcíhuaangixy. Oy ñich ajcxy nninïcx yjaccöminajc'idïch jabom jabom, per ñich ajcxy njot nhuinma'ñ nigi mic'ajt paady jabom jabom.

17 Je tzaachypi je ayo'n huídibi nminajxim nyajnajxim ya naaxhuiñ, ca' yí ytimytiijity. Cixip naxip yí'. E mïd co nminajxim nyajnajxim tzaachypi ayo'n, huin'it nbaatim oy'ajtin nigi ymijity y'oyity huídibi ca' ycixipy ñaxipy ni mina.

18 Ca' huaad ñich ajt nhuinma'ñ nbidaacim ma huídijaty cixamb tigoyamb. Tüg'óciy tijaty yaj'ijxp yajhuindïcxp ya naaxhuiñ, cixip tigoyip yí'. Per huídijaty ca' yaj'ixy yajhuindïcxy, idip yí', ca' ycixipy ytigoyipy nimina.

5

1 Com nnejhuiyim co n'o'cim, naaxnicx ajt huídibi mïd'ajtim ya naaxhuiñ cixamb tigoyamb yí'. Dios ymïd ni'ixí' jii by tzajpjoty huingbi

ninïcx huïdibi yi' ti cojy huïdibi xymöhuaanim. Je ninïcx huïdibi xymöhuaanim jadu'n nipaady ma ajt n'alma nej tüg tijc huïdibi tinaayb huinixii huinïtiempo. Tüg tijc huïdibi Dios ti cojy, ca' nan huïdibi jäy ajcxy ti cojcixy.

² Janch tiy'ajt co ca' ooy jotcuje ndzinaayim ya naaxhuiñ müd ajt nninïcx. Ooy njijp'ijxim mina nbadaanim ajt je nninïcx huïdibi nmüd'adaanim jii by tzajpjoty.

³ Je' nninïcx xyüdzim tim jadu'n nej co tüg jemyhuit nyajtigiiyim, ca'ydi n'ijtim nihuädz.

⁴ Nami njactzinaayim ya naaxhuiñ müd ajt nninïcx, ca' ooy jotcuje nayjihuiiyim. Ooy xyajtajim xyajmayim je tzaachypi ayo'n huïdibi nminajxim nyajnajxim. Ca' nan co ca' ndzojcm ajt nninïcx, o co nyajtigoyaanim ajt nninïcx. Hue' ndzojcm co nmüd'ajtim jemybi jugy'ajtin jemybi ninïcx jigix co ajt njugy'ajtin huïdibi cixamb tigoyamb, ahuimbidi y' jemybi jugy'ajtin huïdibi ca' ycixipy ytigoyipy.

⁵ Dios yi' ti yaj'oyiy je jugy'ajtin huïdibi nmüd'ajtim cham, jigix jëbi nmüd'ajtim huingbi jugy'ajtin huïdibi ca' ycixipy ytigoyipy ni mina. Dios ti xymoyim je Espiritu Santo je' je' tiy'ajt ma ñch ajtin co nbadaanim jemybi jugy'ajt jembyi ninïcx.

⁶ Jabom jabom ñch ajt jotcuje naybidaacim. Nejhuiiyim co nami n'jactzinaayim müd ajt nninïcx, ca' nmüd'ajtim jemybi ninïcx, ca' nyajpaatim ma ajt nHuindzin Jesús chinäy.

⁷ Je' nninïcx xyüdzim tim jadu'n nej co tug jemyhuit nyajtigiiyim, ca'ydi n'ijtim nihuädz.

⁸ Jotcuje etz jotmic nayjihuiyim. Nigi jotcuje ixyipy nayjihuiyim, e ooy njatzojcm co mic'amy ixyipy n'ijxmajtzim jada ninicx, jigix nicxy ndzinaydacpijcm ma ajt nHuindzin Jesús chinäy.

⁹ Paady ycixp jadu'n njacjogy'ajtim njactzinaayim jigix jëbi ajt nHuindzin Jesús jäygidägy py ajt ndzinaayin. Ca' ñejity pen njactzinaayim ixyipy müid ajt nninicx, o pen tzojc n'ijxmajtzim ajt nninicx ixyipy, e nicxim ma Jesús yajpaady.

¹⁰ Nidüg'óciy ñch ajt nayguëxigaanim ma Cristo ytiydundac, e jüby nidüg nidüg paadip huidi anajty nipidzümip jadu'n nej anajty ti chinäy, pen oy, o ca' y'oyity.

Je ayuc tity'ajt huidibi nicy'ajt cidägy'ajt müid

¹¹ Com nejhuiyim co copicy nhuindzigüiyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuiyb co tudägy ñch njot nhuinma'ñich. E nañ jadu'n ndzocyich co miich ajcxy mnejhuiygyixipy co tudägy ñch njot nhuinma'ñich.

¹² Ca'p ñch ajcxy yam naygapxpáatigixy jadüg'oc co ñch ajcxy ooy n'oyjäyity, o co ñch ajcxy ooy oy ndúngixyich. Hue' janchtiy lugar nyejcpyich, jaydëbi miich ajcxy xycapxpadipyich etz jotcuje mnayjihuiyigixipy müid ñch ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuiñyijp ooy oy yquëxigy, e ca' ajcxy tuñ cuendi pen je' müid oyjot oyhuinma'ñ, o pen ca'.

¹³ Pen minamb jäy ajcxy co ñch nlocity, huen xyajnájxcixyich loci müid Dios ycixpi. Pen

jäy minaangixp co oy huinma'ñ nmïdïdyich, jëbi jadu'n ajcxy xyajnájxcixyich jadu'n nej oy huinma'ñ nmïdïdyich mïd miich ajcxy m'oy'ajtin ycixpi.

¹⁴ Com Cristo ooy xychojcm xyjihuiyim, paady ycixp njatytimycapxymidoohuim Cristo. Com nnejhuïyim ajt nidüg'óciy tiydudägy co Cristo y'o'cy mïd ajt nbocy ycixpi, e paady ycixpi jadu'n nipaady nej jihuiy nidüg'óciy ïch ajt ti n'o'cim quipxyi mïd Cristo.

¹⁵ Cristo o'c mïd tüg'óciy jäy ajcxy ycixpi, jigix co tüg'óciy jäy ajcxy huïdibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy mïd Cristo ycixpi huïdibi o'c mïd yi' ajcxy ypocy ycixpi, etz yjugypijcy jadüg'oc mïd yi' ajcxy ycixpi.

¹⁶ Mïd co ndzinaayim mïd Cristo ycixpi, paady ycixp ca' ndunim cuendi naaxhuiñyjäy ajcxy nej ñayñigápxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxni xii tiempo, ca' ndunim cuendi nej naaxhuiñyjäy ajcxy capxcixy miydaaccixy.

¹⁷ Com tigachjaty cham nhuinjihuiyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymïd'ajtnip, jadu'n nipaady nej jihuiy ti ma'xung'aty huinjemy. Je jot je huinma'ñ huïdibi anajty ymïd co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huïdibi ya yajpatp, jiiiby chooñ ma Dios, Dios yaj'oyiday. Mïd huïdijaty Cristo

ytuun m̄id ñich ajt yc̄ixpi, jotcuje n'ijtim m̄id Dios. E Dios xyajñibjic̄ich co ngapxhuäc̄xyich Dios y'ayuc jadu'n nej jäy ajcxy jēbi ajcxy jotcuje y'ijtc̄ixy m̄id Dios.

¹⁹ Jadu'n nm̄inaanim co Dios ym̄id'ijtpy Cristo. E Dios tuun quipxyi m̄id Cristo co yi' yaj'oȳiy je tzip nej naaxhuiñjȳy ajcxy midzip'aty Dios. Dios ca' yajcom̄idohuañ jäy ajcxy ypocy hūidibi m̄ibjcc̄ixp Cristo, m̄id co Cristo ti yajpocyñ̄ihuächyii. E Dios ti xyajñibjic̄yich co ngapxhuäc̄xyich yi' y'ayuc nej jäy ajcxy jēbi paadip pocyhuinmeec̄xin, etz nañ jadu'n paadip jotcuje'ajtin ma Dios.

²⁰ Paady nhuidityich m̄id Cristo yc̄ixpi ngapxhuäc̄xyich Cristo y'ayuc. Jadu'n huimb̄idz̄imyb nej jihūiy miich ajcxy Dios xym̄inuc̄xtaacc̄ixy m̄id ñich n'ayuc jigix mm̄ibjcc̄ixipy Cristo y'ayuc. Paady ngodin̄äyich Cristo co nm̄inuc̄xtac̄ypich miich ajcxy. Jothuimb̄ijtc̄ix nej m̄duñd̄igooyḡixy m̄id Dios yc̄ötujc̄in e Dios xyhuinmeec̄xip ajcxy mbocy, jigix jotcuje m'id̄ipy ajcxy ma Dios.

²¹ Cristo ca' ma ytund̄igooy, per m̄id ajt nbocy yc̄ixpi Dios yajnax̄ je Cristo jadu'n nej t̄üg pocyjäy. Jadu'n Dios ytuñ m̄id je Cristo, jigix co ñich ajt n'ijtim ma Cristo, nbaatim je tudägy'ajtin hūidibi Dios chojcpy nm̄id'ajtim.

6

¹ ñich ajcxy etz miich ajcxy quipxyi nduunim ma Dios ytung. Nm̄inuc̄xtac̄pyich miich ajcxy co mgöbiḡipy ajcxy je may'ajt je oy'ajt hūidibi Dios ti tuñ m̄id miich ajcxy yc̄ixpi, ca'ydi ñaad̄iḡi'aty Dios ytung.

² Com jadu'n jaybety y'ity ma Dios ñecy ma Dios jadu'n ymına'ñ:

Co je xii tiempo ti patni, ti ñch miich m'ayuc midoohui. Ti nbubety nbudigiyich je huin'it xii je huin'it tiempo co ti yhuaad'aty mina jäy ajcxy y'alma ñidzögipy. Jadachambi xii tiempo ti yhuaad'ajtni mina jëbi Dios xyñidzoocim ajt n'alma.

³ Ca' pin n'adzipyich co nduñich ma Dios ytung, jigix ca'ydi pinjaty ymına'ñ co ca' oy nduñich.

⁴ Nañ jadu'n ca' n'adziba'ñich miich ajcxy. Nigi ndzocyich co ñiguëxigip tüg'ociy ñch ndung co nduñich mid Dios ycixpi. Ooy nyajtuñich mecx-tujcin. Ooy nmechtucyich ayo'n etz tzaachypi. Ooy nyajmayjatyich nhuit nducxy ngaayin n'uucin. Ooy ñch ndzinaayin chipity.

⁵ Ti ajcxy xyci'atyich, ti ajcxy xypidáacixyich pu-jxtigoty. Ti jäy ajcxy xymibidigyich, e ooy ajcxy yhuaangixy yjihuigyixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minajity ayuu n'ityich.

⁶ Nyajniguëxipy ñch ajcxy co ñch ndungixyich mid Dios ycixpi, mid co huadz jot huinma'ñ nmididyich ajcxy. Ca' ma jibicpi nmididyich ajcxy, mid co n'ixpijccixyich ma Dios ytiy'ajt. Ooy mechtujcin nmididyich ajcxy. Ooy ñch ajcxy nba'ayooyich nmigügtijcich. Dios yjihu'iñ ymic'ajt yajpatp ma ñch ajcxy njot nhuinma'ñ. Ooy ñch miich ajcxy ndzojccixy njihuigyixy cixyjot huinjot.

⁷ Nyajniguëxipy ñch ajcxy co ndungixyich mid Dios ycixpi, mid co ngapxhuäcxixyich Cristo y'ayuc ytiy'ajt tudägypi, e nañ mid co

nm̄ididyich ajcxy Dios yjihuĩ'ñ ymic'ajt, etz m̄id co nm̄ididyich ajcxy ca'pxy Dios ytiy'ajt tudägypĩ. M̄id yi' ytiy'ajt tudägyp nyajm̄ibicyich jäy ajcxy, etz m̄id yi' ytiy'ajt naygohua'ñyijich ma nm̄idzipich.

8 Minaajity jay xycapxpáadygixyich; m̄inaajity jäy ajcxy xyñigapxy xyñi'oj̄iygixyich; m̄inaajity jäy ym̄inaangixy co oy nduuñich; m̄inaajity jäy ym̄inaangixy co jibic nduuñich; m̄ina ngamina jäy xytj̄icixyich co n'ñndáaccixyich; e m̄inaajity jäy ym̄inaangixy co tiy'ajt ngapxpich.

9 Minaajity jäy ym̄inaangixy co ajcxy ca' xy'ixy'ájtigixyich; e m̄inaajity jäy ym̄inaangixy co ooy oy xy'ixy'ájtigixyich; e m̄inaajity ayo'n j̄j̄p'am o'cin j̄j̄p'am nhuidj̄tcixyich. Per jactzinaaybich ajcxy jadu'n. Ti je tungm̄idpi xychaachytúngixyich, per ca' ñich ajcxy xyaj'o'cyi.

10 Ooy ñich ajcxy njatajcixy njamaaygixy, per jabom jabom jotcuje nayjihuíygixyich. Ayoobi ñich ajcxy ca' ti meeñ etz ca' ti pidägy nm̄id'ájt̄cixyich. Per nañ jadu'n mayjäy oy'ajt̄in pada'ñ ma Dios m̄id ñich ajcxy ndung ycixpi, jadu'n jada oy'ajt̄in nipaady nej meeñ etz nej pidägy. Oy ca' meeñ etz ca' pidägy nm̄ididyich ajcxy, per nm̄idich ajcxy t̄üg'óciy huidibi nimina ca' ycixy ytigooy.

11 Migügt̄ijc ajcxy, huidibi yajpatp j̄im Corinto, ti nm̄idcapxcixy ti nm̄idm̄iydaaccixy ma jada necy m̄id t̄üg'óciy tudägy'ajt. Ti ngapxyich nm̄iydägyich nej njot nhuinma'ñ nm̄ididyich.

12 Ca' ñich n'ixmach nej ñich miich ajcxy ndzojccixy njihuıygixy cixyjot huinjot.

13 May'ajt nbijctzooybich ma miich ajcxy co xyajnim̄ahuıbich nej miich ajcxy mjot mhuinma'ñ

müidity tim jadu'n nej ti nduunich müd miich ajcxy. Jadu'n may'ajt nbijctzooyich ma miich ajcxy nej ungededytjc ajcxy oy'amy y'ung ajcxy ïhuijcixy capxhuijcixy.

Ich ajt je' ma Dios jugypi chinaayin

14 Miich ajcxy, ca' mdungmujccixy m'ayoomujccixy müd jäy ajcxy huidibi ca' mibijccixy Cristo. Com ca' huaad tudägyjäy ajcxy müddzinaaygixy jäy ajcxy huidibi ca' tudägy huinma'n müdity. ¿Nej jëbi je huidibi tiy'ajtip ytügy müd huidibi ca' ytiy'ajtity? ¿Nej jëbi pinjaty tiy'ajt müd müd'idipy pinjaty huidibi ca' tiy'ajt müdity? Je huidibi tiy'ajt müd jadu'n nipaady nej chinäy ma jin ytücxin. E je huidibi ca' tiy'ajt müdity ñipatp nej jihuiy chinäy agootztuuby.

15 ¿Nej jëbi Cristo etz Satanás ñay'ayuc-huinjihuiyigixy? ¿Nej jëbi tüg mibijcpi yajtügiy yhuinma'n müd tüg huidibi ca' ymibicy?

16 Ca' ni nej jëbi tzaadzech quipychech y'idipy ma Dios ytijc. Com yi' ajcxy huidibi tzaadzech ojadajtp ca' ajcxy yhuinma'n ytügy müd Dios ytiy'ajt. Je Dios juugypi ymüd chinaydac ma ïch ajt njot nhuinma'n, paady ycixp jadu'n ïch ajt nipaady nej Dios ytijc. Com jaybety y'ity ma Dios jadu'n ymina'n:

Ndzinaydac nbidägaamybich ma yi' ajcxy.
Huididaamybich ma yi' ajcxy yajpaady.
Yi' ajcxy ïch xyDios'adaanip. E ïch ajcxy yi'
njäy'adaanip.

17 Paady nañ jadu'n ajt nHuindzin Dios ymina'n:

Copicy co miich ajcxy m'ixmadziipy yi jacjadyii jäy ajcxy, e tzinaaygix abicy. Ca' ajcxy mni-jot'adipy je jibicpi, huin'it ich miich ajcxy ngöbigipyich.

¹⁸ Ich miich ajcxy xymiid'adipyich jadu'n nej jihuüy ich miich ajcxy xyTeedy'adyii. E jadu'n miich ajcxy m'idipy nej ich nmang n'anäg.

Jadu'n je mijpi Dios ymina'ñ.

7

¹ Miich ajcxy huidibi ooy ndzocy njihuüyich, com Dios jadu'n ymina'ñ co tzinaydac pidäga'ñ ma ajt njot nhuinma'ñ, paady ycixp tzoc yajhuaatzim ajt njot nhuinma'ñ, etz ma ajt n'espíritu, e jadu'n Dios nhuindzigiyim etz nyajmij'ajtim cixyjot huinjot.

Co ajcxy jothuimbijt ma Dios huidibi ajcxy jim Corinto

² Tungix may'ajt xycöbigipich miich ajcxy cixyjot huinjot. Ca' ich ajcxy ni pin ti nmidundigóoygixyich, nañ jadu'n ca' ni pin ich ajcxy ti nyaj'ixpijccixyich jibic-huinma'ñ. Nañ jadu'n ni ca' ich ajcxy pin ti nhuin'ñich.

³ Ca' jadu'n mmina'ñich mñd co nya-jpocycähua'ñich miich ajcxy. Com jadu'n jacjayip ti mña'ñich co ooy ndzocy njihuüyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy.

⁴ Ooy ich miich ajcxy njot'amij'adyiijich. Ooy ich miich ajcxy ngömaaygixy. Ooy jotcujc nayjihuüyijich mñd miich ajcxy ycixpi. Oy njayajpaadyich tzip agujc ayo'n agujc, per co njäyechich miich ajcxy, jotcujc nayjihuüyijich.

5 Nej ïch ajcxy nja'ty ya Macedonia, ca' njotcujc'ájtcixyich. Hue' nyajpaadyich ajcxy tzip agujc capxy agujc huen ma'ámyity. Jáy ajcxy xymidzip'ajtpich, etz nañ jadu'n tzigïybich jotjoty huinma'ñjoty.

6 Per Dios je huídibi yajjotcugïyb yajjotmicpijcp pinjaty tajp mayb, yi' ti xyajjotcugïyich co Tito yja'ty ya ma ïch nyajpaady co jim choñ ma miich ajcxy.

7 Ca' nan ti njotcugïyich mïid tim jëyi co Tito ti xyñijädyich. Hue' ti njotcugïyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmïidmïydägyich jadu'n nej miich ajcxy tajin mayin mjihuïygixy mïid mbocy ycixpi. E nañ jadu'n nej mhuinmaaygixy nej nyajpaadyich. E mïid jada ayuc ñgi ti njotcugïyich.

8 ïch ca' ndajy nmayich mïid co ïch miich ajcxy ti nyajtajcixy ti nyajmaygixy mïid je necy huídibi ajcxy nyajnigüeix. Oy anajty ti njajihuïyich jotmay co nnejhuïyich co miich ajcxy ooy mdajy may tüg xii mejtz xii mïid ïch nnecy ycixpi.

9 Jadachambi ooy jotcujc nayjihuiyijich. Ca' nmïinaanim mïid je tajin je mayin ycixpi huídibi miich ajcxy anajty mïid jotcujc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' ïch ti ndundigooyich ma miich ajcxy co ajcxy njotmaymoy.

10 Com Dios yjäygidacpyi co jäy njothuimbijtcixy, mïid co taj may ñayjihuiyigixy mïid ypocy ycixpi. E co ajcxy yjothuimbijtcixy, huin'it ajcxy je y'alma

nīdzocin paadiņpy. E ca' je' huaad nidajim ni-maayim co ajcxy y'alma ñīdzögy. Co jāy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy.

11 Miiid je tūgpi jāy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jāygidāgy. Tungix cuendi jada' cham nej ti yhuimbīdzimy. Tiydudāgy janch cham ti mdiydungixy miiid je pocy ycixpi. Ti xyajjotma'tcixy, e ti xy'adzīgiiygixy, e ni'ixīy miich anajty m'ijtcixy co mdzaachytunaangixy je huidi ti ytundigooy. E miiid jada ycixpi ti miich ajcxy myajniģēxīccixy, co ca' miich ajcxy ti pocy mmiiidity ma jadayaabi huinma'ñ.

12 Co iich miich ajcxy jayhuin nijayiy, ca' nmīnaanīm miiid je' ycixpi huiidibi anajty ti ytundigooy. Nañ ca' nmīnaanīm miiid je huiidibi anajty ti yajmidundigooy. Nijayiiyich miich ajcxy, jīgix jēbi mnejhuīygixy je tiy'ajt nej Dios tzocy co nduuiñich miiid miich ajcxy m'oy'ajtin ycixpi.

13 Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcuje'ajt, e nañ jadu'n iich ajcxy ti nbāatcixyich jotcuje'ajt miiid miich ajcxy ycixpi. Nañ jadu'n ooy ti njotcugiīyich ajcxy miiid co Tito ooy chachjotcuje'ity. Oy'amy miich ajcxy ti mgöbījccixy Tito, paady yi' ooy ti yjotcugiīy miiid miich ajcxy ycixpi.

14 Co ti nnimāyich Tito co njot'amij'adyiijich miich ajcxy, ca' ti tzo'ydu'n ti nbaadyich, co yi' oy ti xyco'ixīygixy. Nīgi oy ti yhuimbīdzimy miiid co tūg'óciy ayuc huiidibi iich miich ajcxy ti

nyajnimäy ti yhuimbıdzımy co yjanchıty. Nañ jadu'n ti yhuimbıdzımy co yjanchıty jadu'n nej ti nnımıydacyıch miıch ajcxy mııd Tito co njot'amıj'adyııjıch miıch ajcxy.

¹⁵ Jadu'n nej co Tito oy miıch ajcxy xycogapxıy, yı' ooy nıgı xychojccıxy xyjhııygıxy co yı' ne-jhuıy jadu'n nej miıch ajcxy mmıjottıgooygıxy ııch n'ayuc, jadu'n nej mgapxymıdoohuaangıxy. E nañ jadu'n co yı' ijxy nej miıch ajcxy yı' mgöbıjcy mııd tzigı'ñ jıhuı'ñ.

¹⁶ Ooy jotcuyc nayjıhuıyııjıch, ooy njot'amıj'adyııjıch miıch ajcxy.

8

Ycüejtcıxy mııd oyjot oyhuınma'ñ

¹ Jadügnax, miıch ajcxy mıgügtıjc, nyajne-jhuıhuaamybıch nyajmııdmıydägaamybıch miıch ajcxy, jadu'n nej Dios may'ajt oy'ajt tuñ mııd je mıbıjcpıdıjc ajcxy huıdıbı xıı ya yajpatp Macedonia.

² Je mıbıjcpıdıjc huıdıbı ya yajpatp ti ooy ajcxy mııaxy yajnaxy tzaachypi etz ayo'n. Per ca' ñejıty, ooy ajcxy jotcuyc yajpatcıxy. Nañ ayooıbı ajcxy, per ti ajcxy may meñ yajmujccıxy, jadu'n nej jıhuıy ajcxy ycomeeñıty.

³ ııch testigo co je mıgügtıjc mııd ycı'm tzojcın meñ yejccıxy, nej jėbı ajcxy ymadaaccıxy mııd meñ, ıxtı anaxy ajcxy yejccıxy.

⁴ Ooy xymııucxtägyıch ajcxy co n'a'ıxıhuıbıch ajcxy co jėbı ajcxy meñ yajmujccıxy huıdıbı mııd pubedaangıxy jacjadyıı je mıbıjcpıdıjc.

5 Nĩgĩ anaxy ajcxy ooy meeñ yajmujcy ca'ydi jadu'n nej anajty njĩp'ixyich. Jayĩp ajcxy ñayyejci ma ajt nHuindzĩn Jesucristo, e huiñ'it ajcxy ñayyéjci gixy ma ñch ajcxy jadu'n nej Dios tzocy.

6 E chi jada' ñch ajcxy ooy nmĩnucxtacy Tito co huen nĩcxy jadüg'oc ma miich ajcxy. Huen nĩcxy yajcixy yajmay huiðibi ti yajtzondägy ma miich ajcxy. Co huen je meeñ yajmujctäy huiðibi cixyot huiñijot mĩd mbubedaangixy je mĩbijcpĩdijc ajcxy huiðibi yajpatp jĩm Jerusalén.

7 Miich ajcxy nĩgĩ ooy mmadaaccixy, ca'ydi jacpĩnjaty ma tüg'ociy Dios ytung. Ooy mij mĩbijcĩn miich ajcxy mĩdity. Ooy myaj'ixpijccixy Dios ytiy'ajt. Ooy mmijottĩgooygixy mguydunaangixy ñch n'ayuc. E nañ jadu'n ooy miich ajcxy xychojccixy xyjihuiĩygixyich. Nañ ooy ndzocyich co miich ajcxy nĩgĩ pubejtĩn myegĩpy ma je mĩbijcpĩdijc huiðibi jĩm Jerusalén.

8 Ca' jadu'n n'ane'myich co mbubéjtcixĩpy je miğügtijc huiði jĩm Jerusalén. Hue' ndzocyich co miich ajcxy mnejhuĩhuĩpy jadu'n nej yĩ jacjadyii mĩbijcpĩdijc yhuinma'ñ bĩdaaccixyp ci'm co pubedaangixy je ymiğügtijc jĩm Jerusalén. Jadu'n mdunĩpy ajcxy jigix jėbi nnejhuĩhuĩbich pen janch tiy'ajt jadu'n co mdzojccixy mjihuiĩygixy yĩ jacjadyii mĩbijcpĩdijc.

9 Com miich ajcxy mnejhuĩygixyp jadu'n nej ajt nHuindzĩn Jesucristo mijmay'ajt mij'oy'ajt tuñ mĩd ñch ajt ycixpi, jadu'n Jesús nipaady nej tüg mijcomeeñybi jĩiby tzajpjoty, mĩd co yĩ' xychojccim xyjihuiĩyim mijcajee, chi yĩ' ixmajtztay yĩ' y'oy'ajtĩn jĩiby tzajpjoty co yciðacy ya naaxhuiñ

etz y'ayooy ya. Miich ajcxy ca' anajty ti mñidity jiiyby tzajpjoty, per jadachambi mbadaangixyp mij'oy'ajtin jiiyby tzajpjoty.

10 Mñid miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jëbi huaad mdungixy ojjäy'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydi jac ni pinjaty ti myajtzondaaccixy meen yajmugii huidi mñid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc.

11 Jadachambi tiempo jactungix pubejtin, meen yajmujccix cixyot huinjot jadu'n nej ti myajtzondaaccixy ixti mabaad myajmaygixy je meen yajmugii. Nidüg nidüg yejccix nej ajcxy ii mñidity.

12 Pinjaty y'ofrenda yejcp janch cixyot huinjot Dios ycöbijcip yi' je' y'ofrenda, jadu'n nej ii mñidity. Dios ca' yi' pijctzoy huidibi ajt ca' nmñidity.

13 Ca' mnina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuimigixy ayo'ndumb.

14 Hue' yajmna'ñ co quipxyjaty mdzinaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy nmñidity ca'pxy je huidibi mnidzinaáygiyip, ixti miich ajcxy conajxpi, paady ycixp jëbi mbubéjtcixipy migügtijc huidibi yajmayajtp. Jadüg tiempo miich ajcxy myajmayjadipy, e jacjadyii migügtijc jëbi xypubéjtcixipy, e jadu'n yhuimbizimipy co mnaybubéjtigixy quipxyjaty miñ xyipy.

15 Com jadu'n jaybety y'ity ma Dios ñecy ma jadu'n ymína'ñ: “Pínjaty anajty may'amy mîd, ca' yajconajxy. E pínjaty anajty hueeni mîd, ca' yajmayajty.”

Tito mîd ymîgügtîjc ajcxy

16 Per nyajnajxypîch jäygi daacin ma Dios, com Dios ti pidägy ma Tito yjot yhuinma'ñ co mijottîgooy miich ajcxy m'oy'ajtîn, tim jadu'n nej îch nmijottîgooyîch miich ajcxy m'oy'ajtîn.

17 Co may'ajt nbîjctzooyîch ma Tito co nicxîpy jadüg'oc ma miich ajcxy, agujc jotcujc cöbicy, com ti anajty jayîjp yhuinma'ñ pidägy cî'm co ñicxa'ñ jadüg'oc ma miich ajcxy. Jadachambi Tito nicxîp ma miich ajcxy mîd cî'mdzojcin.

18 Quipxyi mîd Tito nguexy îch ajcxy yam tûg nmîgûg huîdibi ooy chachcapxpaadyity majaty mîbîjcpîdîjc, co ooy oy ytuñ capxhuäcxî Jesús y'ayuc ytî'y'ajt nej huaad jäy ajcxy y'alma nîdzoocin paady.

19 Ca' nan jëyi co je mîbîjcpîdîjc yi' ycapx-padyii. Nañ jadu'n ti yhuin'ixyîi mîbîjcpîdîjc ajcxy co jëbi yhuîdity mîd îch ajcxy, e tunîpy pubejtîn mîd je may'ajtîn oy'ajtîn huîdibi îch ajcxy ndumybach mîd je mîgügtîjc ycîxpi jîm Jerusalén. Jadu'n nduüñîch jaydëbi jäy ajcxy capx-paadîp ajt nHuîndzî Jesucristo. Etz nañ jadu'n jaydëbi ñiguëxîgy co îch ajcxy nbubeda'ñîch ajt nmîgügtîjc cîxyjot huînijot.

20 Ooy ngüend'atyîch je meeñ huîdibi je mîbîjcpîdîjc ti yajmujccîxy, jîgîx ca'ydi pîn huaad xyñîgapxy xyñî'ojîyîch, jadu'n nej îch ajcxy meeñ nyajmújccîxyîch.

21 Jadu'n ñich ajcxy nhuinma'ñ nbídägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

22 Nañ jadu'n nguejxypich mïd yi' ajcxy jadüg ajt nmigüg, je huídibi oy ti ytuuñ ma Dios ytung quipxyi mïd ñich ajcxy e nejhuiybich co tudägy ytuñ cixyot huinjot. E yi' miich ajcxy ooy xyjot'amij'adyii, e oy ytuna'ñ mïd miich ajcxy ma Dios ytung.

23 Pen jim pinjaty nidiy yajtiy je Tito, nimaaygix co ñich yi' nmigüg, e yi' mïd nduuñich ma Dios ytung ma miich ajcxy. E nañ jadu'n pen jim pinjaty nejhuihua'ñ pinjäy ajcxy yi', yi' jacjadyiibi huídibi ajcxy nicxp mïd Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mïd Cristo ymij'ajtin ycixpi.

24 Paady ycixp miich ajcxy yi' mdzójccixipy mjihuüygixyipy je migügtijc ajcxy huídibi mimb mïd Tito, jigix jëbi je mibijcpidijc ma nidüg nidüg cajp ya Macedonia nejhuihuipy co miich ajcxy yi' mdzójccixy mjihuüygixy je mibijcpidijc tiydudägy. E paady ycixp jëbi ñich jotcuyc nayjihuüyijich mïd miich ajcxy ycixpi.

9

Je cüejtin mïd je mibijcpidijc ajcxy ycixpi

1 Nañ ca' yjaty ycopicyity co ñich miich ajcxy njacnijayüygixyipy co je mibijcpidijc huídibi xii ya pubejtin tunaangixyp ma Dios yjäy huídibi ajcxy jim Judea.

2 Com nejhuiybich co miich ajcxy nañ jadu'n mbubedaangixy cixyjot huinijot Dios yjāy huiidibi ajcxy jim Judea. Paady ycixp jotcuje ñich jadu'n nnimāyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidōjimijt co mbubedaangixy je mibijcpidijc huiidibi jim Judea. E mñid co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huiidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n.

3 Paady nguejxypich Tito mñid jacjadyii migūgtijc ma miich ajcxy, jaydēbi xypubéjtcixipy ma je meññ yajmugñi, jadu'n nej ti mbidaaccixy huinma'ñ. E ñich ca' ti tzo'ydu'n nbáadibich mñid miich ajcxy ycixpi ma jada pubejtin huiidibi ajcxy mguexamyb jim Judea. Com ñich ti nnimāyich mayjāy co miich ajcxy ni'ixi' m'ijtcixy mñid mbubejtin.

4 Ca' yjeyity co nijējity mibijcpidijc huiidibi tzinaayb ya Macedonia ñicxa'nip ajcxy mñid ñich co anajty nñicxyich jim ma miich ajcxy. E co anajty ñich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuñhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuñhuip.

5 Paady ycixp huinma'ñ nbidāgyich co oy jadu'n co nijējity migūgtijc nñicxy jayijp xycogapxiygiy, e huen xypubejtcixy ma yi meññ yajmugñi jadu'n nej jidōjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy mñidity yi m'ofrenda, e jēbi jāy ajcxy nejhuiñhuip co yi

m'ofrenda ti myejjccixy cixyjot huiniyot, ca'ydi jäy ymınaangixy co ñch miich adzip ajcxy ti n'ane'mgixy co m'ofrenda nyajmújjccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni y cosecha yajpidigy. E pinjaty mij niip, nañ jadu'n mij y cosecha yajpidigy.

⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyb pinjaty cixyjot huiniyot y'ofrenda yejcp.

⁸ Dios jëbi may'ajt oy'ajt tunipy mïd miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmïd'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax oyjäy'ajtin.

⁹ Jadu'n jaybety ymiñ ma Dios ñecy, ma jadu'n ymına'ñ:

Yi oyjäydijc ajcxy, yi' ajcxy nimooyb ayoobitijc huidibi ajcxy yajmayjajtpy. Yi oyjäydijc ajcxy co oyjäy'ajtin tungixy, yejjccixyp ijxpejt oybi huidibi y'idipy huinixii.

¹⁰ Dios yejcpy je tïm huidibi jäy ajcxy ñiipy, nañ jadu'n Dios yejcpy je jïcxy picy huidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuiy mgosecha myajpidiccixy may'amy.

¹¹ E jadu'n miich ajcxy mïd'adipy tüg'óciy jugy'ajtin comeeñ'ajtin, jaydëbi m'ofrenda

myejccixy mij'amy. E mayjäy ajcxy Dioscojuyip yajnaxipy ma Dios mïid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayajtp.

¹² Co ïch ajt pubejtïn nyejcim ma jacjadyii migügtijc, canan jëyi co nbubejtïm mïid tijaty yajmayajtcixyp. Nañ jadu'n yi' ajcxy jëbi yajnaxcixy Dioscojuyip canaag'oc.

¹³ Yi' ajcxy capxpadamb Dios mïid co je m'ofrenda huidibi ajcxy ti myejccixy, yi' je' tiy'ajtïp co miich ajcxy mgapxymïdoogixy Cristo y'ayuc ytiy'ajt. Paady ycixp may mïbijcpïdijc ajcxy Dios ojadájtçixipy e nañ jadu'n Dios ïbáatçixipy capxpáatçixipy mïid je pubejtïn huidibi miich ajcxy anajty myejcpy mïid yi' ajcxy ycixpi, etz nañ jadu'n mïid jacjadyii mïbijcpïdijc ycixpi.

¹⁴ E ci'm yi' ajcxy Dios ojadadipy mïbijctzohuipy mïid miich ajcxy ycixpi, etz xychójjcixip xyjihuíygiçixip ooy mïid co Dios je mijpi conuucxin ti yecy ma miich ajcxy.

¹⁵ Dioscojuyip yi' Huindzin'ajtïm Dios mïid yi' ymijconuucxin huidibi ti yecy ma ïch ajtïn, ni pïn canejhuïy nej jëbi yajnajtzcaxïy.

10

Pablo mïidity cõtujcïn co y'apóstol'adyii

¹ ïch Pablo nmigapxypïch miich ajcxy mïid yungnaxy njot nhuinma'ñ, jadu'n nej jihuíy Cristo miich ajcxy xymïidmïydaaccixy. Com Cristo yungnaxy jot huinma'ñ mïidity. Nijëjity miich ajcxy ymïnaangix co ooy yungnaxy naybidägyiijïch co n'ityïch mïid miich ajcxy,

e jadachambi co jiguëgy nyajpaadyich, hue' n'ahuimbityich ahua'ñ, ndunaamybich ti ndunaamybich.

² May'ajt nbijctzooybich co anajty ïch miich ajcxy nicxy n'ijxcixy, ca' jadu'n ndzocyich co copicy n'ahua'ndägibich mïd nijëjity miich ajcxy huidibi xyñihuambejtpich, co nduñich etz ngapxyich ngi'mtzojcïn tim jadu'n nej huenpïn naaxhuiñjây ytungixy etz ycapxcixy mïd yci'mtzojcïn. Janch ni'ixi' n'ityich, co anajty jim nmechich, chi mïd nnayhuindïnähuiybich yi' ajcxy huidibi jadu'n xyñihuambejtpich.

³ Janch tiy'ajt co ndzinaayich jadu'n nej naaxhuiñjây chinaaygixy. Per ca' ndziptuñich nej jây ajcxy chiptungixy.

⁴ Ca' ïch ajt nyajtunim naaxhuiñjây ymic'ajt co nnaygohuaanim ma je jibicpi huidibi xymïdzip'ajtim. Hue' nyajtunim Dios ymic'ajt, huidibi jëbi mïd nmimadaacim tüg'óciy huidibi ca'oybi mïd.

⁵ Jadu'n ïch ajcxy ca' nyajtzobadáangixyich je ayuc tiy'ajt huidibi ca' yjanchity, etz je' ayuc pïn amij agix naybidaacip co Dios y'ayuc ytiy'ajt adujci. Tüg'óciy naaxhuiñjây y'ayuc ytiy'ajt nbidáaccixyich ma Cristo, jigix tüg'óciy jây ajcxy capxymïdohuip Cristo.

⁶ Co anajty miich ajcxy mhuinma'ñybidaaccixy co huädz mgapxymïdohuaangixy tüg'óciy Cristo y'ayuc ytiy'ajt, pinjaty cacapxymïdoy, hue' ni'ixi' n'ijtcixich co yajmöhua'ñ castigo pinjaty cacapxymïdoo.

⁷ Miich ajcxy yi' mdzachcuendïtungixy jây ajcxy

nej yjäy'ajtcixy. Pen jim pinjaty ñayjihuiyii janch agujc jotujc co Cristo yhuin'ixyii müd ytung ycixpi, huen huinjihuüygixy jotjoty co Cristo ti xyhuin'íxcixyich nañ jadu'n müd yí ytung ycixpi.

8 Ich ca' ti tzo'ydu'n jihuiyich müd co ci'm nnaygömayiijich hueeni müd co Jesucristo xymooygixyich ane'min cötujcin. Com ich ajt nHuindzin Jesucristo ti xymóoygixyich jada cötujcin, jigix ich miich ajcxy nyajyeecip mmibijcin, canan nyajtigoyip ajcxy mmibijcin.

9 Ca' jadu'n ndzocyich co yquëxigipy jadu'n nej jihuiy n'adzigihuaangixy müd je necy huidibi nya-jniguejxypich miich ajcxy.

10 Yminaangixy co ich nnecy ooy tzaachy-jaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmíydáacinich ca' pin jäygidägy.

11 Per yí jäy ajcxy huidibi jadu'n minaangixp, copicy ajcxy nejhuühiipy co jadu'n nej ich ngapxin necyjoty co nijayüygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

12 Ca' huaad n'ocnay'ijxquipxim o nyajtügiyim müd yí ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip müd yci'm'ayuc yci'mhuinma'ñ huidi ii yajtpy ñejhuüyb.

13 Ca' ich ci'm naygömayüyb ma ycapadyii, huidibi ich ajcxy ca' xypátcixyich. Dios ich ajcxy xyajnejhuüybich nije' nije' it lugar ma yí tzocy ndúngixibich. E Dios jadu'n tzojc co nicxy

ndungixy jim Corinto ma miich ajcxy myajpatcixy.

14 Paady ycixpi ndungixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ïch jayijp ti n'ityich ma miich ajcxy. Pues ïch tim jayijp ngapxhuäcx Dios y'ayuc ma miich ajcxy, e ca' jac ni pin.

15 Pen huingbi jäy je Dios ytung yajtzondaacip ma tüg cajp, pues ca' ïch huaad jim nduuñich, jadu'n nej jihuïy ïch ti nyajtzondägyich je tung. Ca' jadu'n nduuñich, hue' njijp'ijxypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich.

16 Co anajty jadu'n ti njactuñich ma miich ajcxy, huin'it xï ya n'ïhuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

17 Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm.

18 Com Dios ca' jäygidägy pinjaty ci'm naygömayip. Hue' Dios yjäygidacypï pinjaty ajt nHuindzin Jesucristo capxpatp.

11

Pablo etz je' ajcxy huïdibi y'ayuccapxhuäcxp mïd anï

1 Huaad co miich ajcxy ixypy xy'ocmïmecxtujcich hueeni ïch nloci huinma'ñ huïdibi ngapxaamybich. Oy ixypy ñejity mïmecxtuccich.

2 Ooy ndzocy ooy njihuüyich miich ajcxy. Dios ti xymöyich je tzojcin jihuüyın huıdibi nmıdich mıid miich ajcxy ycıxpı. Ndzojcypich co cıxyjot huınıjot miich ajcxy mmıjpidaccıxy Cristo. Co miich ajcxy yajmıj'adıp Cristo cıxyjot huınıjot, huın'ıt jadu'n miich ajcxy nıpaadıpy nej tüg töxy'anäg pi'cnıp huıdibi pijcp mıid tüg yëydic.

3 Ndzıgıybıch co huıngbı jäy xya-jhuınma'ñydgoyaangıxy mıid xpıcytıjc y'ayuc huıdibi ca' ytıy'ajtıty. E miich ajcxy m'ıxmadzaangıxy jadu'n nej cıxyjot huınıjot ti mmıjpidaccıxy Cristo. Tım jadu'n nıpada'ñ miich ajcxy mjadaangıxy nej yajty jecy'ajty je Eva co tza'ñ yhuın'ıni.

4 Com miich ajcxy mgöbıjccıxy huıngbı jäy huıdibi tıgachjaty yaj'ıxpıjcp Jesús ytıy'ajt, ca' yjadu'nıty nej ıch ajcxy nyaj'ıxpcıyich. Etz nañ jadu'n miich ajcxy jotcujc mgöbıjccıxy huıngbı espıritu, ca' yjējıty je Espıritu Santo huıdibi ti mgöbıjccıxy jayıp'aty. Etz nañ jadu'n mgöbıjccıxy tıgachjaty ayuc tıy'ajt, e ca' y'ocjējıñ huıdibi ajcxy m'alma xyajnıdzoocıp. Ca' y'ocjējıñ huıdibi ti mmıdoogıxy ma ıch ajcxy. Mıc'amy mdzachmıjpidaccıxy huıngjäy y'ayuc.

5 Ca' jadu'n ytıy'ajtıty co yı huındzındıjc ajcxy huıdibi naydıjıgıxp Jesús y'apóstol huıdı jım ma miich ajcxy, co jac mıc'ajt mıid ajcxy etz yjacmıid ajcxy ıxpıjcin ma Dios ytıy'ajt, ca'ydı ıch.

6 Oy ıch jada' ca' njatyıch nej yajxon ngápıxbıch, ca' ooy ngo'ayúcıgıch. Per ca' ñejıty com yajxon njatyıch nnejhuüyıch Dios ytıy'ajt. E ti nyaj'ıjxcıxy nyajnejhuüygıxy co n'ıxpıcyıgıch ma Dios ytıy'ajt

míid je ayuc huídibi ngapxhuäcxich ma miich ajcxy etz je mijhuinma'n huídi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxyich Jesu-cristo y'ayuc ma miich ajcxy e ca' nbijctzooyich meen' míid ndungich ycixpi? Jadu'n nnayyaj-najxich anajty nej tüg midumbi jigix miich ajcxy jac'oy jacjotcujc mdzinähuij.

⁸ Ti ngöbicyich meen' huídibi jacjadyii mibijcpidijc ti xymöyich huídibi tzinaayb ma huingbi cajp. Yi' ajcxy ymeen' nyajtuunich co nyaj'ixpijcyich miich ajcxy.

⁹ Co n'ijtyich míid miich ajcxy jadöjimijt jadöhuix'am ca' nbijctzooyich ma miich ajcxy huídibi nyajmayjajtpyich anajty. Ca' n'adzijpyich ni pin. Yi migügtijc huídibi ajcxy tsoon Macedonia, yi' ajcxy xymooyich huídibi anajty nyajmayjajtpyich, paady ycixp ca' anajty meen' nbijctzooyich ma miich ajcxy, ca' n'adzijpich miich ajcxy. E jadu'n njactuna'nich jadu'n nej nduunich míid miich ajcxy co n'ijtyich jim jadöjimijt.

¹⁰ Nejhuüyibich co yjanchity co nmíididyich Cristo ytiy'ajt, nañ tim jadu'n nnejhuüyich co ci'm nbaadyich huídibi m'idnay'ixyijich. E ca' pin ma tüg'óciy je Acaya naaxjot xycapíjcbich jada jotcujc'ajtin.

¹¹ ¿Na'amy co jadu'n nmína'nich? ¿Je' co ich miich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich miich ajcxy.

¹² Per njacyajtüyöyaamybich je ndungich huídibi ndumyibich, e ca' meen' nbijctzohua'nich míid ich

ndung ycixpi jigix co yi jacjadyii huindzindijc huidibi yajixpijccixp ma miich ajcxy, ca' jëbi y'indaaccixy co yi' ajcxy tú'ciy ytungixy jadu'n nej ìich nduuñich.

¹³ Yi' ajcxy yminaangixy co Cristo ti yajnibijcigixy co ajcxy yi' y'apóstol'adyii, e ca' yjanchity, nigooob ajcxy huin'ingixy yi mibijcpidijc. Nayyajnájxigixy ci'm nej jihuïy Cristo y'apóstol'ájtigixy, e ca' yjanchity.

¹⁴ Nañ ni ca' oy nhuinmaayich co jadu'n idüitzcixy, com nañ jadu'n je Satanás ñayyajtigachyïi ñayyajnaxyïi nej Dios y'ángel huidibi tiy'ajt mïid, e ca' yjanchity.

¹⁵ Paady ycixp nmibijcpich co yi jäy ajcxy huidibi tumb mïid je mujcu' nañ jadu'n nayyajnaxyïi jadu'n nej jäy tudägypi, e ca' yjanchity. Per Dios chaachytunamyb ajcxy jadu'n nej ypadyïi mïid je jibicpi ycixpi huidibi ajcxy ytumyb.

Je tzaachypi je ayo'n huidibi Pablo yajtyp co y'ayuccapxhuäcxy

¹⁶ Jadüg'oc ìich miich ajcxy nnimaaygixy: Ni pin ycamina'niy co ìich locijity. Per pen nijëjity jadu'n yminaangixy, ca' ñejity. Miich ajcxy amidoo'ijtcix ìich n'ayuc, jigix jëbi naygömayiijich ci'm.

¹⁷ Ca' ìich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm.

¹⁸ Mayjäy ajcxy ooy ci'm chachnaygömayáanigixyp mïid huidibi ti tungixy mïid yci'm mic'ajt ya naaxhuiñ. Nañ jadu'n ìich nmaygömaya'ñyijich ci'm.

19 Miich ajcxy mdzachcöbïjccixyp loci jäy ajcxy y'ayuc, je' co mdzachnayyajnaxáanigixy jadu'n nej jihuïy ajcxy ooy mdzachcohuinma'ñity.

20 Mgöbïjcpy miich ajcxy co jäy ajcxy xytumbi'adïyb nej tim tzojccixy, huïdibi ajcxy xyhuinjicxp xyhuimbïjcp xyhuimmeetzp, e huïdibi ajcxy xy'ane'mgixp, xycamij'ijxcixy xycamijpïdaaccixy, ixti mgöbïjccixyp co xycojxcixy ma ajcxy mhuiñyjïp.

21 Oy njatzo'ydu'njihuïyich co nmïna'ñich co ca' jadu'n nmïdïdyich je jotmic'ajtin, jigix jëbi ïch miich ajcxy nduuñich jïbic, jadu'n nej yi jadu'mbi huindzïndïjc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyïijich ci'm. Ca' ñejity pen capxpïch jadu'n nej tüg loci jäy.

22 Pen hebreojäy yi' ajcxy, hebreojäy ïch nañ jadu'n. ¿Conaax cogajp ajcxy Israel? ïch nañ jadu'n. ¿Abraham ajcxy ymij'ap'ajtpy ymijteedy'ajtpy? ïch nañ jadu'n.

23 ¿Nej tumb ajcxy mïd Cristo? Nïgi nduñyich mïd Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduuñich mïd Cristo ca'ydi yi' ajcxy. Canaag'oc codungdïjc xychaachytuñich. Ti nyajcï'atyich mïd matz etz mïd coochac janch canaag ci' janch ycama-cho'nity. Canaag'oc codungdïjc xypïdaacyich pu-jxtïgoty, e yi' ajcxy ca'. Canaag'oc o'cin jïjp'am ti nyajpaadyich, e yi' ajcxy ca'.

24 Migoox'oc judïojäy ajcxy ytungmïdpi xycï'ajtyich mïd cochac iïpx majmocx mïdaax ci'.

25 Tugüig'oc xychaachytuuñich müd matz. Tügtecy ajcxy xychaagächich. Tugüig'oc je barco yquüñ mejy'agujc je huidibi üch anajty nyajnicxiyb. Co je barco yquüñ tügtecy, chi tüg tzuum etz tüg xü n'ijtyich ma je mejy anajty ooy ypidügy.

26 Ooy viaje nduuñich canaag'oc, e o'cjipp'am n'ijtyich ma müjnügom yjadyii, e nañ jadu'n ooy anajty may meetzpi yajpaady ma anajty nhuidityich. Nmüggajpich, yi judíojäy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich müd jäy ajcxy huidibi naybidaacip ajcxy nej üch ajt nmügü, e ca' anajty yjanchity.

27 Minaajity ooy müc njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxünnaxyich müd yuu tidzibi. Janam jatzojc n'ayu'atyich. Minaajity ooy njihuüyich je tüchypi, etz nyajmayjatyich nhuit nducxyich.

28 Müd jada ycixpi etz müd jac-huidijaty, nañ jadu'n jabom jabom ooy müc njihuüyich jadu'n nej yajpaady je mübijcpidijc nidüg'óciy canaag picy xi ya.

29 Pen nijëjity mübijcpidijc yajpaady amutz ma ajcxy ymübjcin, nañ jadu'n üch nayjihüyüijich amutz. Pen nijëjity mübijcpidijc ypocytungixy, üch ndzo'ydu'n njihuüybich etz jibic nayjihüyüijich müd yi' ajcxy ypocy ycixpi.

30 Pen naygömayaanibich ci'm, naygömayaanibich co amutz njihuüyüijich.

³¹ Je Dios ñch ajt nHuindzín Jesucristo yTeedy, je huídibi huaad n'ojadajtim n'ñbaatim ngapxpaatim huinixi huiniitiempo, yi' ñejhuíyb co tiy'ajt jadu'n nej ngapxyich.

³² Jecy'ajty co n'ijtyich jim Damasco, je gobernador huídibi anajty tumb mñid je rey huídibi yxi Aretas, ypídac soldados ajcxy ma jadyi mijtu' ycajptigíy, jigix jébi xyajnicxyich mach.

³³ Per je mibijcpídic ajcxy xycodiyñajxich naaxcíxy mijcachjoty ma tüg ventana aguu ma je mijpoch huídibi je cajp mñid yjübojtz'ahuidityity. E jadu'n ndzoocyich ma je gobernador ycí'am.

12

Huídibi Pablo yhuin'ijx etz nejhuíy

¹ Ni ti ycayajpaady ycayajganar'aty co cí'm ndzachnaygömaayim ndzachnayñigapxim ndzachnayñimiyaacim. Per ca' y'ocnejity nimiydägaamybich ti nhuin'ijxypich cumäyjoty, je huídibi je Huindzín Jesucristo xyajhuin'ijxpich xyajni'ixiíybich.

² N'ixy'ajtypich tüg yéydíjc huídibi mibijcp Cristo. Cham majmactz jimíjt ma Dios yajpättigíyíi tzajpjoty ma je midugíigpi tzajp. E ca' nejhuíyich pen hue' yajpättigíyí mñid ñinícx o pen ca'. Dios tügpajc nejhuíyb.

³⁻⁴ Jadüg'oc nmína'ñich co Dios ti yajpättigíy je yéydíjc ma je oybi it. E ca' nnejhuíyich pen janch ti ypättigíy mñid ñinícx o pen ca'. Dios tügpajc nejhuíyb. E jiiy ma je oybi it midoy capxy ayuc huídibi ca' huaad ni pin jäy capxy miydägy nimína.

⁵ Ooy ñich amij agix nayjihuihua'ñyijich miid je jadu'mbi yëydijc jadu'n nej jëjin huidibi Dios yajpättigiy tzajpjoty. Per ca' ñich ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma ñich ndzinaayin.

⁶ Oy ixypy ñich ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy miid miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuuyich jiby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tüg apy ma ñich nninïcx, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich.

⁸ Tugig'oc Dios ti nmibijctzooyich co huen xyajpidzimich je huidibi xyajtzaachiybich.

⁹ Per je Huindzin Jesús xyñimaayich: “Jëbi jadu'n co may'ajt ndunipich miid miich ycixpi. Co pinjaty pumäy ñayjihuiyii, huin'it ñigi ñiguëxigy ñich nmic'ajt.” Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma ñich ndzinaayin.

¹⁰ Paady ycixpi ooy njotcúcidyich co pumäy nayjihuiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich miid

Cristo ycixpi. Co nayjihuiyijich pumäy, chi nigi mic nayjihuiyijich miid Cristo ymic'ajt ycixpi.

Pablo ca' yjotcuje'aty nej je mibijcpidijc ajcxy jim Corinto ytungixy

¹¹ Co ich jadu'n ci'm naygapxpadyijich, tim jadu'n nipaady nej jihuïy ich tüg loci jäy. Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixypy ajcxy xycömaaybich xycapxpatpich. Ich ca'p ich ti nd-zoohuity. Oy ixypy ich ca' ti mic'ajt nmüdidyich, per jatytimy nigi mic'ajt nmüdidyich, ca'ydi yi huindzindijc huidibi ma miich ajcxy, huidibi ajcxy naydijip apóstol, e ca' yjanchity.

¹² Ma je tung huidibi nduuñich miid mecxtujcin ma miich ajcxy, ti ooy ñiguëxigy miid canaag ijx-pejt, mijhuinma'ñ etz milagros, co ich janch Cristo xy'apóstol'adyijich.

¹³ Ca' jadu'n ytiy'ajtity co mmínaangixy co nigi oy ti nduuñich ma yi jacjadyii mibijcpidijc ma jacjadyii cajp, ca'ydi jadu'n nej ti nduuñich ma miich ajcxy. Pen ti ndundigooyich co ca' ti nbijctzooyich meen miid ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meexcich ajcxy.

¹⁴ Jadachambi ni'ixi' n'ityich co nnicxa'ñich midugüg'ocpi jim ma miich ajcxy. Ca' ti pubejtin nbijctzohua'ñich ma miich ajcxy miid ndungich ycixpi. Ca' ndzocyich miich ajcxy mmeeñ. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydi co miich ajcxy xypubedipyich. Jadu'n ich nipaady

m̄id miich ajcxy nej t̄ug ungedeedy. Je ungedeedy ypubejtpy y'ung, e ca' nan je ung pubejtyp yteedy.

15 Ich jotcuje nyajtundāhuiḃich ma miich ajcxy t̄ug'óciy tijaty nm̄idich, ixti ngi'mm̄ic'ajtich t̄ug'óciy nyajtunaamyḃich m̄id miich ajcxy ycixpi, jigix jēbi nbubedipyich miich ajcxy. Oy janiguēxigy co ich miich ajcxy njadzojccixy njajihuīygyxy, e miich ajcxy ca' xychójccixyich xyjihuiīygyxyich.

16 Nijējity miich ajcxy mm̄inaangixy co janch tiy'ajt co ca' ti pubejtin ti nbijctzooyich ma miich ajcxy, nijējity ym̄inaangixy co janch nihuinma'ñ ti nyajcāgixyich ma t̄ug tramp̄i m̄id an̄i.

17 ¿Nej ti ich miich ajcxy nhuin'ingix m̄id je migūgt̄jc huiḃi ajcxy nyajniguejx?

18 Nbijctzoohuich may'ajt ma Tito co huen nicxy xycogapxīygyxy jadūg'oc. E nyajpuguexīyich jadūg'ajt nm̄igūg huiḃi m̄id ñicxy quipxyi. ¿Nej ti miich ajcxy Tito xyhuin'ingixy? ¿Nej ca' yjanchity co ich etz Tito quipxyjaty ich ajcxy nhuinma'ñ nm̄idity, e t̄u'ciy ndūngixyich?

19 Ca' yjeyity co miich ajcxy mhuinma'ñybiḃáaccixy co ich ajcxy ndzach-nayñigapxtūutigixy ma miich ajcxy. Ca' yjadu'nity. Ngāpxcixpich nm̄iydāaccixpich ma Dios yhuinduu je ayuc tiy'ajt huiḃi Cristo xymóoygixich. E t̄ug'óciy huiḃi ndūngixpich, hue' ndūngixich jigix yeegip miich ajcxy mm̄ibijcin.

20 Com tzigīyḃich co anajty nicxy n'ijxcixyich miich ajcxy, ca' jeyity co nbadaamyḃich je tiy'ajt co miich ajcxy ca' mhuinma'ñm̄idity jadu'n nej jēbi njāygidāgyich

yí mhuinma'ñ ajcxy. E miich ajcxy nañ jadu'n ca' mjäygidáaccixipy nej ñch nhuinma'ñ mïdidyich. Tzigïybich co miich jada' ajcxy mnaychiptúnigixy, ca' mnay'ixáanigixy nidüg nidüg, mnaymïjotmá'tigixy; mnayñi'ojïyigixy, e mbiitzcapxcixy; co ooy amij agix mnayjihuíyigixy, e ca' mnay'ayuc-huinjihuíyigixy, ca' oy m'ijtcixy.

²¹ Tzigïybich co jadüg'oc nicxy n'ixyich miich ajcxy, chi ajt nDios xyajjihuíhuibich tzo'ydu'n mïd miich ajcxy ycixpi, etz njihuíhuibich tajin mayin mïd miich ajcxy mbocy ycixpi, e com ca'ni mjothuimbijtcixy mjäydigooygixy je mjibic-huinma'ñ jadu'n nej mmigapxtigooygixy e mmidundigooygixy huingbi töxyjäydijc, etz jadu'n nej mmidundigooygixy migüg ytöxyijc, etz jadu'n nej jibic-huinma'ñ miich ajcxy mmïdity.

13

Ane'min capxhuijin etz capxpoox'in huidibi cijxnip je necy

¹ Jada je' ymidugïg'oc co ñch miich ajcxy nicxy ngo'ixihuaangixyp. Pen miich ajcxy mxihuaangixyp tüg migüg ma ñch co ti ytundigooy mïd Dios ytiy'ajt, hue' tzocy mïd metz o tugïg testigos.

² Co je mïmejtz'ocpi ñch miich ajcxy oy ngo'ixiy, chi nnïmaayich yí' ajcxy huidibi ti ytundigooygixy anajty, e nañ jadu'n nnïmaayich je huidibi jacpocytungixp co ñch anajty jadüg'oc nicxy miich ajcxy n'ijxcixy, ca' nyajtuna'ñich mecxtujcin ma yí huidibi ajcxy pocytungixp. E cham co nyajpaadyich jïguëgy ma miich ajcxy,

nnägapxpejtpyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp.

³ E jadu'n miich ajcxy mmid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mic'ajt midity. Hue' je' yajniguëxigyp ymic'ajt ma miich ajcxy.

⁴ Janch tiy'ajt co jadu'n ajcxy yajcruudzpejty Jesucristo nej jihuïy ca' anajty mic'ajt midity. Per jadachambi Jesucristo jugy'ajtp mid Dios ymic'ajt. Nañ tim jadu'n co n'jtim mid Jesús, jadu'n yquëxigy nej jihuïy ca' mic'ajt nmid'ajtim. Per co n'ida'ñich mid miich ajcxy, nmid'adaanibich Dios ymic'ajt mid co nyajpaadyich ma Cristo.

⁵ Ci'm naydiy'ajtpjicigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgimdzinaayin, pen janch mmibijccixy. ¿Nej ca' mdimjihuimybijccixy, pen mid ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nigixy cohuajc.

⁶ Per njjip'ijxypich co miich ajcxy mnejhuïhuipy co yjanchity co Cristo ti xyajnbicyich yi' ytung, e ca' n'indägyich.

⁷ Dios nmibijctzooybich mid miich ajcxy ycixpi, jigix ca' ti jibic-huinma'ñ mdúngixipy. Canan co ñich ajcxy ndzachcömaybidzimmáangixyich, o co ñich ajcxy nigimidity Dios ytiy'ajt ca'ydi jac ni pinjaty. Jadu'n ndúngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuïy ñich ajcxy ca' oy mij n'ixpicycigich.

⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy

co tüg'óciy huídibi ndunim, naybadib mïd Dios ytiy'ajt.

⁹ Paady jotcujc ñch ajcxy co nyajpáatcixyich nej jihuïy ca' ñch ajcxy mic'ajt nmïdity, jigix miich ajcxy mic'ajt mmïd'adipy ma mmibijcin. Nmibijctzoohuaamybich ajcxy Dios mïd miich ajcxy ycixpi, jigix ajcxy mmibijcin mi'ljtcixipy ca'pxy.

¹⁰ Jada necy ñch jayijp nguexamyb ma miich ajcxy, ma yam ca'ni nicxy n'ljxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñch n'ane'min ma miich ajcxy. ñch ajt nHuindzin Jesucristo ti xymöyich mic'ajt, jigix jëbi ñch miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich mïd miich ajcxy, huen Dios xypubéjtcixipy xypudigüiygixipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcujc'ajtcix. Chinaaygix mïd tú'ciy mjot mhuinma'ñ. Naymïd'ljtigixy agujc jotcujc. Huen ajcxy Dios xymïd'ljtcixy. Je Dios huídibi jotcujc'ajtin yejcp, e nañ jadu'n Dios xychojctáaygixipy xyjihuiydáaygixipy.

¹² Naygapxpóocxigix xic xon.

¹³ Tüg'óciy Dios yjây huídibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy mïd miich ajcxy ycixpi. Huen Dios xychojccixy xyjihuiygixy. Huen Dios yjihui'ñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycixyich. Amén.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

4190de74-18ab-52cf-ba4e-5f99ab05892f